

文献并征续国魂

——纪念中华古籍保护计划实施十周年

中华古籍保护计划十周年记

郑小悠

中华古籍保护计划，肇自丁亥，历十春秋矣。或云孔壁遗文、汲冢旧籍，本系先贤之泽；兰台度牒、枣板摹传，无非守成之业。然其存亡继绝、补敝起废，端赖今人之力；化身千百、踵事增华，洵属开创之功。既云开创，则其繁剧艰辛之可知矣。惟其左支右绌，惨淡经营，夙夜匪懈，始有微劳。嗟夫！磨剑十年，霜锋初试。无以志者，谨为之文。其辞曰：

夫典籍者，天子士夫历代欲世守而难守也。其广采哀衷，必欲世守而共千秋者，何哉？曰载大道、曰传薪火、曰鉴后人。其频劫多厄，岂奈难守而辄散佚者，何哉？曰罹天灾、曰遭兵燹、曰触禁毁。

昔龟形鸟迹，文字始炳；三坟五典，王道发彰。周室密简，付老聃以守藏；汉延宝牒，自歆向而编摩。洎乎弘文聚书，册府辟丹宸之馆；邮侯插架，海内慕汲古之家。至永乐辑汇，无厌浩繁；四库搜罗，博收竹素。丹诏十行，开私藏之进献；奎阁七置，广中秘之流辉。当夫书之欲守而能守之时，校雠辩证，自见饱学之士；诂论史实，正富济世之才。

然藏之极丰，毁之极酷；遭泽愈深，被难愈著。嬴秦焚书，经史并从燔荡；汉魏鼎革，图籍屡踵锋鏑。继之开元极盛，俄顷悉灰于安史；肃代鸿集，少间尽覆于黄巢。至北兵征伐，罹祸无算；倭寇掳掠，不知凡几。东观琳琅，溯黄河以漂沉；绛云善本，遭回祿而烬余。值此书之欲守而难守之际，国倾大厦，几有覆没之险；道悬累卵，惟待孤灯之传。

可知盛世昭时，莫贵于文明，而莫重于守书。丁亥春，枢府命下，春官董其大政；十曹共襄，宿儒备以顾问。别开一署，并驾兰台；增置员额，日理庶务。自是海内风响，效法如仪。所膺诸事，举其大而且繁者有五。

曰重清厘以求确数。特因文楼翰府，自古聚散无定；盈屋累栋，从来多寡未悉。故细绎清点，最称紧要。其缥囊细帙，片纸务尽；贝叶梵夹，搜罗恐阙。上沿虞夏，咸挹海以求珠；下及明清，各披沙而见宝。穷绝万里，采佐卢之遗字；雪没马鼻，访灵宝之旧章。检点之下，部次甲乙，延阁以储。其极罕而至珍之籍，列目以崇其文；富藏而能守之馆，锡名以嘉其善。

曰养人材以延绝学。凡欲成其事，首在得人。当是时，海内芸编如牛毛，十蠹七八；书医如麟角，万无一二。然裱补之技，旧多口传心授，记付阙如。必师徒相传，始得其法；经年累月，方堪其任。盖身教言教，养材之法出于三途；群策群力，受业之士遍于四方。自是程才效技，宿老乐传其学问；恐后争先，后进思继之衣钵。

曰补蠹烂以存全本。夫典籍存世者，历代水火兵虫之劫余也。朽坏霉烂，并少完璧。今苦心庀材，八行精绎竹棉；协力鸠工，万指齐理璋璜。至宛委珍藏、海内孤本，则临深履薄，局高踣厚。必待胸盈丘壑，运匠心之独妙；手回三春，夺天工之奇巧。凡天禄琳琅、平水佛典、佐卢秘籍、夜郎陆书，多经整伤，已焕然可观矣。


曰兼藏用以广文明。兹者五经垂训，六幕同文。前车后鉴，古以资今。故典籍者，守藏为致用之先，致用乃守藏之要。汪钝庵先生云：“藏之之难不若守之之难，守之之难不若读之之难，尤不若躬体而心得之之难。是故藏而勿守，犹勿藏也；守而弗读，犹勿守也。”今缩尺为寸，仓颉托于无形；扣而望之，四海同乎有象。形不可捉而长存，文不必勒而无差，岂非前贤赖此以明之乎？

曰定条规以固成法。孟子曰：“不以规矩，不能成方圆。”夫典籍之藏用，其纤悉必到，定程序、核举动者，标准也；其提纲挈领，正名义、示劝惩者，法令也。斟酌古今，删繁就简，标准连绵而告竣；参究中外，谋始图终，法令粗就而待成。至其成矣，则依模就范，若迭矩而重规；循轨知途，益轻车而熟路。


兹者重熙累洽，稽古右文。前岁，枢廷筹五载之算，开邦计之新。琳琅之守，俨列大政。真可谓应期而降，适当其时也！惟筚路蓝缕，群哲既开其先；发扬光大，我辈宜善其后。嗚呼！国之有史，其来尚矣，史不作，则国之离。史之有籍，踵其迹矣，籍不守，则史之匿。惟其籍之能守，则史备赅载而传千秋；惟其史之能传，则国聚民心而垂鸿祚。殆籍之守，其不重乎？守之善，其不难乎？念兹在兹，朝斯夕斯。磨砺以须，屈指试期。



北京大学教授 龚鹏程 书




中华书局编审 程毅中 书



大连图书馆终身名誉馆长 张本义 书



国家文物鉴定委员会主任委员 傅熹年 书



全国古籍保护工作专家委员会主任 李致忠 书

题中华古籍保护计划实施十周年

张志清

仓颉悟鸿迹，画字得玄真。
典籍存青史，名山启后人。
纤纸铺素玉，羽翰缀文麟。
帛竹传古韵，梨枣刻精神。
世代务守藏，朝暮理丘坟。
册府充屋栋，汗牛载聚珍。
德风披千里，文教化远民。
可招云雷动，能取万星辰。

佚亡称书厄，燃炬最暴秦。
流沙坠汉简，灵骨埋殷屯。
黄卷遭劫去，寄命在英伦。
大典掷烈焰，强盗鼓舌唇。
文章三千载，百化化吹尘。
英雄徒扼腕，贤哲杳无闻。
青灯阅旧话，凛凛寒气频。
至今开故纸，犹叹苦传薪。

烽火射狼至，临难岂遑避？
金甌衔虎口，奔之身莫悔。
善本流沪上，孤岛救沉沦。
天一农家藏，文渊地母存。
海岳横大梁，护书真国魂。
高义照肝胆，人间有昆仑。
长风孤月朗，鸿迹去有痕。
何期丹青手，再绘一乾坤。

吾道正如此，传承在耕耘。
学海汇百川，后生志天津。
匠心补残卷，再造复绝埋。
寒暑习诗礼，知行体甘醇。
君子天行健，羲和驾初晨。
经略与著述，大道俱可陈。
剖心致同侪，华夏力陶熏。
金玉良可宝，作器见大钧。

奉题中华古籍保护计划十周年二阕

石任之

法曲献仙音

高穴搜奇，魏陵窥奥，聚玉收霞功业。二百残编，九丘遗气，曾观天扁开阖。扫鲁壁青苔净，灵光起微霎。万签插。骋玄思、化鱼游海，归来说、珠在睡颞之颌。简静事铅黄，扣卷心、声响鞞鞞。共采芸香，护婀娜、缥帙珍匿。正曝书时近，我咏古人相答。

皂罗特髻

护书事业，幸十载披图，历游珍籍。护书事业，异代成相识。研朱校、护书事业，更钩玄、砭砭为求索。护书事业，待一展荆棘。惟愿护书事业，免人间书厄。发金匱、护书事业，缀陈迹、方寸中微力。护书事业，道运行能及。